

Incumbensa da la fracziun da la PPS concernent il sancziunament dal traffic da guntgida (emprim sutsegnader Gort)

Dapi onns han spezialmain las vischnancas e lur populaziun sin l'axa nord-sid sco er sin la via naziunala N28 en il Partenz da cumbatter cun il traffic da guntgida. Quel na blochescha betg mo las vias en las vischnancas e restrenscha lur qualitad da viver, el impedischa er las forzas da salvament e pudess custar temp decisiv en cas d'urgenza.

La soluziun dal chantun da serrar ils access cun agid da forzas da segirezza na po betg esser ina soluziun durabla, n'è er betg economica ed impedischa vinavant ils abitants, perquai ch'els na pon betg utilisar lur emprima e meglra sortida pussaivla.

La vischnanca da Birsfelden schlia quest problem autramain e cunzunt en moda digitala. Ella fa quai cun ina controlla da passadi automatica cun agid dal sistem da leger ils numers d'immatriculaziun Catch Ken da la firma Bredar SA. Tenor l'ordinaziun «Teilfahrverbot Gemeindestrassen mit automatischer Durchfahrtskontrollen» vegnan las vias communalas restrenschidas resp. serradas per il traffic da guntgida. Excepciuns valan per las abitantas ed ils abitants da Birsfelden e dal quartier Freuler a Muttenz sco er per las interpresas e las instituziuns domiciliadas al lieu. Ulteriuras excepciuns èn cuntegnidas en l'ordinaziun.

Ina tala regulaziun che permetta a las Grischunas ed als Grischuns u almain als abitants ed a las interpresas da las vischnancas pertutgadas da charrar libramain e segir, fiss er giavischabla per las vischnancas grischunas che vegnan mulestadas da colonnas.

Las sutsegnadras ed ils sutsegnaders drizzan la suandanta incumbensa a la Regenza:

La Regenza vegn incumbensada da suttametter al Cussegl grond il pli svelt pussaivel, maximalmain entaifer in onn suenter che l'incumbensa è vegnida acceptada, in project / studi da realisabladad tenor l'exempel da la vischnanca da Birsfelden. Quest project / studi da realisabladad duai cuntegnair ils suandants puncts:

- controllas da passadi automaticas e restricziuns per lung da las vischnancas sin l'axa nord-sid sco er per lung da la N28
- custs e pussaivladads da concepziun, sco p.ex. libra circulaziun per Grischunas e Grischuns
- l'autonomia communal duai vegnir mantegnida

Cuira, ils 23 d'avrigl 2026

Gort, Heim, Roffler, Adank, Bärtsch, Berthod, Brandenburger-Caderas, Butzerin, Candrian, Cortesi, Della Cà, Durisch, Dürler, Grass, Hefti, Koch, Lehner, Menghini-Inauen, Metzger, Morf, Rauch, Ruchti, Sgier